

## Vorrede.

weil du sein doch bedarffest. Vnd bald darauff: wer vor seinem Schöpfer sündiget / der muß dem Arzt in die Hände kommen. Aus welchen angemeldten herrlichen Sprüchen dann gänzlich zu schliessen ist / daß die Artzney ein köstliche Gab Gottes sey / auch derentwegen erschaffen / damit sie dieses vnser bawfälliges Leben / vnd vnserer kräftigen Blödigkeit durch ihr hülff erhielte.

Es haben auch die Weysesten vnter den Heyden / den Apollinen vnd Esculapium zu erfinderen der Artzney auffgeworffen / vnd (aus des waren ewigen Gottes vnwissenheit) diese vnter ihre vbrige Götter gezehlet / wie das hin vnnd wider bey den Griechischen vnd Lateinischen Scribenten zu sehen ist. Vnd damit ich anderer theilen der Artzney jezunder geschweige / so ist die Chirurgia oder Wundartzney vnter denselbigen die ältest vnnd erste gewesen / dieweil sie / wie die Gelehrten zu sagen pflegen / *sentui sit propinquior, & proinde cognitu faciliior, ac inventu prior.* Das ist: Den äusserlichen Sinnen etwas näher verwandt / vnd derhalben leichter zu verstehen / vnd die erste erfunden worden. Darumb auch der furtreflich Griechische Poet Homerus in

in